

Pelabur mula gementar ekonomi Asia
Utusan Online
26 Julai, 2012

KUALA LUMPUR 25 Julai - Para pelabur mula menunjukkan rasa gementar terhadap Asia, walaupun mempunyai cerita menarik tetapi pertumbuhan ekonomi adalah perlahan sejak kebelakangan ini.

Persoalan mula timbul, adakah ini merupakan pusingan kejatuhan yang boleh pulih cepat dengan kelonggaran polisi? Atau adakah ia merupakan sesuatu yang buruk dan kita perlu berhadapan dengan kadar lebih rendah berbanding sebelumnya?

Realitinya, jawapan kepada persoalan itu berada di tengah-tengahnya. Keadaan ekonomi negara-negara di Asia hanya akan memberi maklum balas kepada kelonggaran polisi dalam beberapa bulan akan datang tetapi kadar pertumbuhan memberangsangkan seperti dekad lalu adalah sukar dicapai.

Menurut penyelidikan HSBC global, beberapa sebab yang memaksa keadaan tersebut berlaku termasuk demografik dan bukti pertumbuhan produktiviti semakin perlahan.

"Cabaran pertumbuhan Asia bukan sesuatu yang mengejutkan. Apabila ekonomi matang, ia akan tumbuh perlahan.

"Ia adalah lebih mudah untuk tumbuh pantas ketika kita 'miskin' tetapi sukar dilakukan apabila kita 'kaya'. Apa yang pasti, mereka yang berpendapatan pertengahan pasti terperangkap," katanya.

Tambah penyelidikan itu, sejarah menunjukkan negara-negara tumbuh perlahan apabila mereka matang dan berada di atas pada paras pendapatan per kapita tidak dapat meningkat.

"Oleh itu, persoalan yang bermain di minda pelabur adakah Asia berisiko untuk mengulangi sejarah?

"Jawapan yang pasti adalah tidak mungkin. Bergantung kepada polisi. Pada fasa permulaan pembangunan, pertumbuhan biasanya dipacu oleh buruh murah dari ladang ke bandar.

"Peningkatan produktiviti boleh dimiliki apabila teknologi asing diimport atau ditiru serta ketidakcekapan dihapuskan," jelasnya.

HSBC berkata, pada masa hadapan pertumbuhan akan bergantung kepada peningkatan kecekapan kerana bekalan buruh berkurang dan gaji pekerja meningkat.

Peningkatan produktiviti juga menjadi sukar untuk dicapai apabila negara-negara bergantung kepada standard antarabangsa.

"Pada masa ini, polisi menjadi penentu dan bergantung kepada kecekapan pengurusan serta di manakah kedudukan sebenar rantau ini," katanya.

Hakcipta Terpelihara © UTUSAN MELAYU (M) BERHAD

Source: http://www.utusan.com.my/utusan/Ekonomi/20120726/ek_02/Pelabur-mula-gementar-ekonomi-Asia